

Uunnga

allannguutissatut siunnersuut

Siunnersuut uunga: Inuussutissarsiutinik ilinniartitsinerit aamma inuussutissarsiutinik ilinniartitsinerup iluani pikkorissaanerit pillugit Inatsisartut inatsisaannik allannguinuq

Aappassaaneerinninnermi Naalakkersuisunit saqqummiunneqarpoq

§ 1-imut

1. § 1 imatut oqaasertaqassaaq:

” § 1

Inuussutissarsiutinik ilinniartitsinerit aamma inuussutissarsiutinik ilinniartitsinerup iluani pikkorissaanerit pillugit Inatsisartut Inatsisaanni nr. 10, 19. maj 2010-imeersumi uku allanngortinneqarput:

1. § 27-mi *imm. 5-tut* ikkunneqassaaq:

”*Imm. 5.* Naalakkersuisut soraarummeernerit aamma misilitsinnerit pillugit malittarisassaliorinnaapput, taakkununga ilaatigut ilanngullugit suliaasiissutinik suliaqarneq, naliliinerit, soraarummeersitsinerit, soraarummeertut kikkuunerinik aalajangiinerit, tamanut ammassuutitsinissaq, karakterit taakkulu soraarummeernerni angusani oqimaaqatigiissinnerat, soraarummeernermut nalunaarneq, soraarummeernermut peqataassagaanni piumasaaqatit, soraarummeernissamut peqataasinnaannginneq, soraarummeernissamut pilersaaruserit, ikiuutissanik atortoqarneq, napparsimalluni soraarummeerneq, soraarummeeqqinnerit, soraarummeernermut peersitaanerit, maalaaruteqarneq imaluunniit maalaaruteqarnissamut piffissaliussat pillugit aalajangersakkat.”

2. § 42, ima oqaasertaqassaaq:

”§ 42. Qitiusumik ilinniarfiit ukioq naatsorsuuffik naatsorsuusiorfigaat. Qitiusumik ilinniarfiit Namminersorlutik Oqartussat missingersuutit, naatsorsuussiornerit aamma naatsorsuutinik saqqummiinerit pillugit aalajangersagaat qaqukkulluunniit atuuttut malittarissavaat.

Imm. 2. Ingerlatsinermut naatsorsuutini aningaasanut inatsimmit aningaasaliissutinik atuinerit immikkut naatsorsorneqartassapput.

Imm. 3. Ingerlatsinermut naatsorsuutit imarissavaat qitiusumik ilinniarfiup ilinniartitsinermut aamma ingerlatsinernut allanut immikkut naatsorsuutai, tamatumunnga ilanngullugit ingerlatsinerit allat suussusii malillugit immikkut naatsorsuutit.

Imm. 4. Ilinniarfiup ilinniartitsinermut ingerlassanullu allanut naatsorsuutaasa avissartinneqarnissat pillugu Naalakkersuisut malittarisassanik aalajangersaasinnaapput.

Imm. 5. Qitiusumik ilinniarfiit aningaasat aningaasanut inatsisimmi annertussusilerneqartut iluanni, ilinniarfiup ingerlanneqarnerani sinneqartoorutaajunnartut amigartoorutaajunnartulluunniit ukiumut aningaasaliiffiusumut tullermut nuussinnaavaat.

Imm. 6 Ingerlatsinermit naatsorsuutit Namminersorlutik Oqartussat kukkunersiuisuinit kukkunersiorneqassapput.

Imm. 7. Naalackersuisut piffissaliussatut aalajangiussaat nallertinnagu ingerlatsinermit naatsorsuutit siulersuisunit akuersissutigineqareersimasut kukkunersiuiernermit oqaaseqaatitaallit, siulersuisut Naalackersuisunut akuerisassanngorlugit saqqummiutissavaat.

Imm. 8. Siulersuisut ingerlatsinermit naatsorsuutit saqqummiunnerisa ilutigisaannik naatsorsuutit tamanut saqqumiutissavaat.”

3. § 44-mi *imm. 3-tut* inissinneqassaaq:

”*Imm. 3:* Naalackersuisut suliamik ilisimasalittut ingerlatsiffimmit inassuteqartoqareerneratigut, suliffeqarfiit ilinniakkanut inuutissarsiutinik imaluunniit qitiusumik ilinniarfimmuut attuumangitsut sungiusarluni suliffissatut akuerisinnaavaat”.

4. § 45-mi ”§ 44”-p kingornatigut inissinneqassaaq: ”imm. 1.” “

Inatsisissatut siunnersuummut oqaaseqaatit

Oqaaseqaatit nalinginnaasut

Allannguutissatut siunnersuut saqqummiunneqarpoq siunnersuummik siullermeerinninnermi ilisimatitsissutigineqarmat inatsisissatut siunnersuummi kalaallisut oqaasertai qallunaatullu oqaasertai imminnut naapertuutinngitsut inatsisissatullu siunnersuutip kalaallisuaani oqaatitsigut ilaatigut kukkuneqartoq.

Allannguutissatut siunnersuummi taakku aaqqinneqarnissaat siunertaavoq.

Inatsisissatut siunnersuutip qallunaatuani kukkunernik amigaatinilluunniit paasisaqartoqanngilaq, taamaammallu allannguutissatut siunnersuummi inatsisissatut siunnersuutip kalaallisuuata oqaasertalersornera kisimi pineqarpoq.

Inatsisissatut siunnersuummi aalajangersakkanut ataasiakkaanut oqaaseqaatit

Nr. 1-imut

Aalangersakkami siunertaavoq Inuussutissarsiutinik ilinniartitsinerit aamma inuussutissarsiutinik ilinniartitsinerup iluani pikkorissaanerit pillugit Inatsisartut inatsisaata nr. 10, 19. maj 2010-imeersup inatsisissatut siunnersuutip kalaallisuaani § 1-imi innersuuussutigineqarnerata amigaataanerata iluarsineqarnissaa.

Aammattaaq inatsisissatut siunnersuutip kalaallisuaani § 27, imm. 5-imi oqaatsit uku taarserneqassapput, ”soraarummerni” uuminnga ”soraarummeerni”, ”soraarummeermut” uuminnga ”soraarummeernermit” aamma ”soraarummernissamut” uuminnga ”soraarummeernissamut”.